

01 JUL 2001

DR MAHATHIR TUTUP MAJLIS SIMPOSIUM MAHASISWA DI UNIVERSITI MALAYA

KUALA LUMPUR, 1 Julai (Bernama) -- Perdana Menteri Datuk Seri Dr Mahathir Mohamad tiba di Universiti Malaya di sini pagi ini untuk menutup majlis Simposium Penegasan Arah Tuju Idealisme Mahasiswa di Alaf Baru.

Ketibaan Dr Mahathir di kampus universiti itu disambut kira-kira 1,000 penuntut di hadapan Perpustakaan Utama UM sebelum beliau menuju ke Auditorium Perdana Siswa, tempat berlangsung simposium itu.

Perdana Menteri yang diiringi isteri Datin Seri Dr Siti Hasmah Mohamed Ali, disambut oleh Menteri Pendidikan Tan Sri Musa Mohamad dan Naib Canselor UM Datuk Dr Anuar Zaini Mohamed Zain.

Perdana Menteri juga dijadual mengadakan dialog dengan penuntut sempena majlis penutupan rasmi simposium itu yang sebelum ini dijadual berlangsung di Dewan Tunku Canselor yang hampir musnah dalam kebakaran pagi Jumaat lepas.

Dr Mahathir dijangka meninjau kerosakan Dewan Tunku Canselor akibat kebakaran, yang disyaki perbuatan khianat.

Di sebalik penyebaran risalah pada Khamis lepas, menghasut penuntut supaya mengadakan tunjuk perasaan membantah kedatangan Dr Mahathir ke kampus universiti itu, Perdana Menteri disambut meriah oleh penuntut-penuntut yang membawa sepanduk mengalu-alukan kedatangannya hari ini.

-- BERNAMA

ROZ ZS RON